

Na kaminda pa Pais Kòrsou (2)

Kòrsou ta haña su outonomia

Mas ku un aña Kòrsou a prepará pa bira un pais outónimo den Reino. Den e próksimo simannan akí gobièrnu ta informábo paso a paso kiko a palabrá ku e otro partnènan den Reino. Siman pasá a repasá kiko ke men Kòrsou outónimo den Reino. Awe ta fiha poko mas riba outonomia.

1. Kiko ke men outonomia?

Outonomia ke men ku un pais – ku no ta independiente – tòg ta goberná su asuntunan interno e mes. Por ehèmpel, Antia Hulandes no ta independiente. Pero for di 1954 Antia tin outonomia sí. Antia mes ta goberná su asuntunan interno, e ta traha su mes leinan, i e ta reglá tur su mes asuntunan. E outonomia di Antia ta reglá den Statüt. Esei ta e lei ku ta reglá e relashon entre e paisnan ku ta forma Reino Hulandes.

2. Kòrsou tin outonomia kaba?

Formalmente ainda Kòrsou no tin outonomia. Pasobra Kòrsou no ta **pais** den Reino ainda. Kòrsou ta un teritorio insular i ta forma parti di Antia Hulandes. Komo parti di Antia, Kòrsou ta hasi diferente tarea su mes sí. Por ehèmpel: enseñansa, salú públiko, ekonomia, asuntunan sosial, etc. Ora Kòrsou bira **pais outónimo den Reino**, e ta haña su outonomia formalmente. E ora ei Kòrsou no ta forma parti di Antia mas. Kòrsou ta sigui hasi tur tarea ku e tabata hasi kaba, i tambe tareanan ku Antia a hasi semper pa nos. Niun di e asuntunan ei no ta bira asunto di Reino. Tur ta bira tarea outónimo di Pais Kòrsou.

3. Pakiko mester a negoshá ku otro partnènan den Reino? Kòrsou no por djis kue e tareanan di Antia, bai ku nan?

- Pasobra tin mas isla i pais den Reino. Kambio pa un, ta trese cambio pa tur. Pa kos bai bon, mester konsultá, negoshá i palabrá ku otro.
- Pasobra Kòrsou mes ke traha huntú riba sierto área. For di 2005 konseho insular di Kòrsou a fiha den un mandato, ku Kòrsou por traha huntú ku e otro partnènan den Reino, a base di **kapítulo 3** di Statüt. E kapítulo akí ta trata koperashon *boluntario* entre e partnènan di Reino. E ta fiha tambe ku por reglá e koperashon den leinan riba nivel di Reino. Esei Kòrsou a hasi.
- Pasobra finalmente, Reino Hulandes mester garantisá nos seguridat hurídiko, nos derechonan, libertatnan i bon gobernashon. Gobièrnu di Reino ke ta sigur ku nos Pais Kòrsou nobo por atendé su responsabilidatnan nobo.

4. Riba kiko a negoshá i palabrá?

A negoshá pa e paisnan den Reino traha huntú riba sierto área di finansa i hustisia. Tur loke a palabrá riba finansa i hustisia, ta reglá den 5 lei di konsenso na nivel di Reino. Esei ta leinan ku e partnènan den Reino a traha huntú **boluntariamente**. A hinka nan den un bachi di Reino pa duna nan un base mas fuerte. E leinan ta pas den e mandato ku konseho insular a duna gobièrnu di Kòrsou na 2005 (mira kontesta riba pregunta 3). Tambe a negoshá kambionan den

E pakete di palabrashon ta trata:

- **Finansa**
 - Solushon pa debe nashonal i supervishon finansiero
- **Hustisia**
 - Konseho pa mantenshon di lei
 - Korte Komun di Hustisia
 - Polis
 - Ministerio Publiko
- **Kambio di Statuut**
- **Konstitushon i leinan orgániko**

(Den e siguiente páginanan informativo, nos ta akklará nan un pa un.)

Statüt pa hasi Kòrsou un pais outónimo den Reino. No a negoshá riba nos konstitushon i leinan orgániko. Pero nan tambe ta forma parti di e pakete di palabrashon.

5. Kòrsou ta pèrdè outonomia si e traha huntú ku e otro partnènan?

Nò. Kòrsou lo koperá ku otronan sin kita nada for di e outonomia ku Statüt ta duna nos. Riba ún aspekto di hustisia so tin duda (nos ta trata esei den un siguiente página informativo). P'esei Kòrsou a eksihí pa Raad van State duna konseho riba e punto ei. Raad van State ta e órgano di konseho mas haltu den Reino.

Kòrsou ta keda asta ku mas outonomia ku vários pais ku ta independiente mes. Por ehèmpel, Hulanda i otro paisnan europeo boluntariamente a entregá gran parti di nan outonomia den man di Union Europeo. Nan ta sinti ku huntú nan ta mas fuerte. Kòrsou ta koperá boluntariamente ku otronan riba algun tereno sí, pero Kòrsou no ta entregá outonomia.

6. Ata ta parse ku Boneiru a entregá un pida outonomia kaba?

E situashon di Boneiru, Sint Eustatius i Saba (islanan BES) ta kompletamente otro for di e situashon na Kòrsou. E islanan BES a skohe pa bira **parti** di Hulanda. Di mes, otro akuerdo ta konta pa nan. Kòrsou no ta bira parti di Hulanda. Kòrsou ta bira pais outónimo den Reino.

E próksimo página informativo ta trata e koperashon riba tereno finansiero.



Kòrda riba nos anochi informativo na Biblioteka Públiko djarason anochi 7or. Bo ke un enkuentro informativo den bo bario òf pa bo grupo? Yama 4633225 pa un sita.